

E whakamārama ana tēnei pukameka i te pūnaha ture taihara me ngā tautoko ka taea e koe hei pārurenga taihara.

He uaua, he ahotea tino nui, ā, he āhuatanga ngaukino hoki te noho hei pārurenga o te mahi taihara. He rerekē te whakarite a ia tangata. He tautoko kei reira hei āwhina i a koe ki te whakarite i ngā pānga whaitake, kare ā-roto hoki o te taihara i ia wāhanga o te hātepe ture taihara, ā, me te wā i muri hoki.

*Tirohia te pito o tēnei pukameka mō ngā whakapā matua me tētahi rārangi kupu.*

## Ngā motika a te hunga pārurenga

E whai tika ana koe kia whakamōhiohia koe mō ngā ratonga āwhina i a koe, kia whakamōhiohia haerehia koe mō te kēhi i roto i te kōti me te mōhio anō ki ngā mea ka pā mai ina haere koe ki te kōti.

E whai tika ana koe ki te kōrero atu ki te kōti mō te pānga mai o te taihara ki a koe. Mēnā ko koe te pārurenga o tētahi taihara nā te tamaiti, taiohi rānei, e whai tika ana koe ki te haere ki tētahi hui rōpū ā-whānau me te tuku kōrero anō mō ngā mea e hiahia ana koe kia puta.

I ētahi kēhi, e whai tika ana koe, tō māngai rānei ki te kōrero mō ngā mea pēnei i te pēhanga ingoa, te utu here, whakarautanga kāinga, te tukuhere rānei.

Ko te tikanga ka hūmārika, ka aroha, ka whakaute hoki ngā āpiha kōti, ngā pirihihana me ētahi atu i roto i te kēhi ki a koe. E whai tika ana koe ki te tūmataiti.

Pānuihia te Victims Code mō ētahi atu kōrero mō ō motika me ngā whakaritenga e tūmanako ana māu. Kei runga tēnei i tā mātau paetukutuku [victimsinfo.govt.nz](http://victimsinfo.govt.nz) me ētahi atu kōrero whaitake.

Mēnā ki ō whakaaro kāore anō kia tutuki ō motika, kāore rānei i pai ngā ratonga ki tāu i tūmanako ai, ka taea e koe te tuku amuamu. Tirohia a [victimsinfo.govt.nz](http://victimsinfo.govt.nz), waea atu rānei ki te Victims Information Line i 0800 650 654.

## Te whakamōhio atu i tētahi taihara

Mēnā he ohotata, me waea atu ki 111 ka pātai atu mō ngā pirihihana.

Mēnā ehara i te ohotata, ka taea e koe te waea atu, te haere atu rānei ki tō teihana pirihihana tūtata. Ka taea e koe te heri i tētahi kaitautoko, te tonu rānei kia tūtaki koe ki a Manaaki Tangata (Victim Support 0800 842 846).

Ka tuhia e te pirihihana ō kōrero. I muri mai, ka tukuna atu he reta, he puka tāpae amuamu me tētahi tau kōnae tohutoro. Waihotia te puka me te tau ki tētahi wāhi pai – ka hiahiatia ēnei kia whakamōhio haerehia koe mō tō kēhi, me ētahi atu mea pēnei i ngā kerēme rīanga.

Ka tūhonoa anō koe e ngā pirihihana ki a Victim Support, tētahi atu pokapū mātanga rānei e tuku ana i ngā āwhina e tika ana mōu.

E aro nui ana ngā pirihihana ki tō koutou haumaruru ko tō whānau. He rerekē ngā hātepe a ngā pirihihana mō ngā momo taihara ka pūrongoia – mā te āpiha kaiārahi koe e whakamārama. Me kōrero atu koe mēnā he māharahara ōu.

Ka taea e koe te waea atu ki te Victims Information Line i 0800 650 654 ki te rapu mōhio atu anō mō ngā rauemi me ngā tari tautoko i roto i tō rohe.

## Te whakatewhatewhanga

Ka kōrero ngā pirihihana ki a koe me ētahi atu mō te taihara. Ka whakaahuatia anō pea e rātau ngā taunakitanga, te heri taonga atu rānei hei taunakitanga āwhina i te kēhi. Ki te nui ngā taunakitanga a ngā pirihihana, ka hopu ā-ture me te whakapā hē i te tangata ki tētahi hara taihara.

---

## UTU HERE

Ina hopukina tētahi, tērā pea ka tukuna ia kia tae rawa ki te wā e tū ai ki te kōti. E kīia tēnei he utu here (bail). I ētahi wā kei reira ngā here mō te wāhi noho o te tangata me te rāhui haere pō. Ki te whakaaro ngā pirihihana ka noho mōrearea koe, ētahi atu rānei i roto i te hapori, ka puritia te tangata ki rō whare herehere kia tae te wā mōna kia haere ki te kōti, ina tono anō mō te utu here.

Mēnā he pāsurenga koe nō tētahi taihara nui (tirohia te rārangi kupu i te pito o tēnei pukameka), ka taea e koe te tuku i ō whakaaro mō te tukutanga ā-utu haere o te tangata. Kei a koe anō te tikanga kia uru atu koe ki te pūnaha whakamōhio pāsurenga. Mō te whiwhi mōhiotanga anō mō ēnei, tirohia ētahi atu o ā mātau mātārere i [victimsinfo.govt.nz](http://victimsinfo.govt.nz)

## TE TAUĀKI PĀNGA PĀSURENGA

Ka pātaihia koe mēnā e hiahia ana koe ki te tuku i tētahi tauāki pānga pāsurenga. Ka whakamārama atu tēnei ki te kōti i te pānga o te taihara ki a koe. Ka taea e te pirihihana whakahaere i tō kēhi, Manaaki Tangata, tētahi atu pokapū rānei te āwhina i a koe ki te tuhi i tēnei tauākītanga. Tirohia he kōrero atu anō mō tō tauāki pānga pāsurenga i raro i *Te whakataunga me te whiu*.

I ētahi wā, ahakoa te kaha ngaio o te whakatewhatewhanga, kāore i te nui ngā taunakitanga hei hopu ā-ture, te heri rānei i te kēhi ki te kōti. E hara i te mea kāore koe i whakaponohia.

---

## Tautoko

Ka taea e koe te tiki tautoko mō te wā e whakatewhatewhahia ai tō kēhi. Mō te tiki tautoko kare ā-roto, ngā tautoko whaitake mō ngā mea pēnei i te rapu mōhio mō te rīanga, waea atu ki Manaaki Tangata i 0800 842 846, waea atu rānei ki te Victims Information Line i 0800 650 654 ki te whai mōhio mō ētahi atu pokapū tautoko i tō rohe.

Ka āhei atu pea koe ki te tiki āwhina mai i te Kaporeihana Āwhina Hunga Whara (ACC). Waea atu ki te ACC Claims Helpline i 0800 101 996, te Sensitive Claims Helpline rānei i 0800 735 566 (mō ngā kerēme e pā ana ki te koeretanga).

## TE TAIHARA TAIOHI

Mēnā nā tētahi taiohi i raro i te 17 tau te mahi taihara, he tino rerekē te whakarite i te take mā te hātepe ture taiohi. He mea nui ngā pāsurenga i roto i te hātepe ture taiohi, ā, e whai tika ana koe ki te haere ki tētahi hui rōpū ā-whānau.

E wātea ana ngā rauemi whānui i Te Tari Āwhina i te Tamaiti, te Rangatahi, tae atu ki te Whānau (CYF) me ngā kōti mō te pūnaha ture taiohi. Ka whakapā atu tētahi kairuruku rōpū ā-whānau mai i CYF ki a koe.

## TE TAUTOKO Ā-PŪTEA

E wātea ana ngā pūtea mā ngā pāsurenga taihara nui (tirohia te rārangi kupu i te pito o tēnei pukameka).

- Ka taea e ēnei takuhe te āwhina i ngā utu whakarite i ngā pānga o te taihara. He whakaritenga āheitanga mō ia pūtea, ā, he tepe mōrahi kei runga.
- Me whakapā atu ki Manaaki Tangata i 0800 842 846 mō ngā mōhiotanga māu hei tono.

Mō ngā kōrero hou rawa e pā ana ki ngā pūtea, haere ki [victimsinfo.govt.nz](http://victimsinfo.govt.nz), waea atu rānei ki Manaaki Tangata.

---

## I te kōti

Ko te tikanga he maha ngā tūnga a te whakapaenga (te tangata whakatuaki taihara) ki te kōti, hei tauira, ki te whakapuaki he hara tōna, kore hara rānei, mō te titiro rānei a te kaiwhakawā i ngā taunakitanga. Ko te tikanga kāore koe e herea ki te haere ki ēnei whakawātanga, engari ka taea e koe te haere mēnā e hiahia ana koe ki te haere.

Ki te whakapuaki te whakapaenga kei te hara ia, ka whakawhiua ia i taua rā tonu, ka whakatauhia rānei he rā mō te whakawātanga whiu.

Ki te whakapuaki te whakapaenga kāore ia i hara, ka whakawāhia te kēhi. Ka whakatakotohia e te kaiwhiu pirihihana, he kaiwhiu Karauna rānei te kēhi ki te kōti, kei te āhua o te kēhi me te momo kōti whakawā.

Nā te mea ka pā ngā taihara ki te hapori whānui, ka mahi te kaiwhiu mā te kāwanatanga, ā, kei a ia te kawenga mō te hāmene kēhi mō te Karauna, ngā pirihihana me te iwi whānui.

Tērā pea ka hiahiatia kia tū koe hei kaiwhakaatu mō te Karauna hei āwhina ki te hāpono i te kēhi ki te whakapaenga (tirohia *Te noho hei kaiwhakaatu*).

---

He roa ngā kēhi kōti i ētahi wā, ā, he uaua. Kāore i te ōrite ki ērā e whakaaturia ana ki te pouaka whakaata. He maha ngā tāngata kei roto, ka mutu he rerekē te reo. Ka taea e koe te kōrero atu ki tō kaitohutohu pārurenga kōti, te te pirihihana whakahaere i tō kēhi, tāu ake kaimahi tautoko rānei mō ngā mea kāore i te mārama ki a koe.

Me kōrero atu koe ki tō kaitohutohu pārurenga kōti, pirihihana whakahaere i tō kēhi, te kaimahi tautoko rānei mēnā e hiahia ana koe i ngā āwhina rongo, nekeneke, whakamāori reo rānei.

He mea nui tō haumaruru. Mēnā he āwangawanga ōu ahakoa te wā mō tō haumaruru i te kōti, me kōrero atu ki tētahi pirihihana, āpiha whakamaruru rānei.

### TE KAITOHUTOHU PĀRURENGA KŌTI

Ina tū tuatahi te whakapaenga ki te kōti, ka whakapā atu tētahi kaitohutohu pārurenga kōti ki a koe. Nāna ake te mahi ki te whakamōhio haere i a koe mō te āhua o tō kēhi, ā, me te wāhi anō ki a koe. Ka taea ano e ia te kōrero atu ki a koe me haere koe ki hea tiki tautoko ā-ngākau, ā-pūtea hoki. He whakamārama anō kei roto i te mātārere *Ngā ratonga mā ngā pārurenga* mō te ratonga.

Kei reira tō kaitohutohu pārurenga kōti, te āpiha pirihihana whakahaere i tō kēhi, tō kaimahi kaitautoko rānei ki te whakamārama i ngā mea kāore i te mārama ki a koe.

Ka taea e koe te whakapā hāngai atu ki tō kaitohutohu pārurenga kōti, mā te Victims Information Line rānei i 0800 650 654.

## Te noho hei kaiwhakaatu

He wāhanga tino nui tō ngā kaiwhakaatu ki roto i ngā kēhi kōti. Ka taea e rātau te tuku i ngā tino taunakitanga.

### I MUA I TE KŌTI

Ki te hiahiatia koe hei kaiwhakaatu, ka kōrero atu te pirihihana whakahaere i tō kēhi, te kaitohutohu pārurenga kōti rānei i te wā me te wāhi me tae atu koe ki te kōti. Ka tukuna anō tētahi pānui whaimana i tō kainga.

Ka kōrero atu te kaiwhiu, te pirihihana whakahaere i tō kēhi rānei ki a koe mō te wāhi ki a koe hei kaiwhakaatu. Ka taea e koe te toro tōmua i te ruma kōti. Kōrero atu ki tō kaitohutohu pārurenga kōti, te pirihihana whakahaere, tētahi kaimahi tautoko rānei ki te whakarite i tēnei.

Me kōrero atu ki tō kaitohutohu pārurenga kōti, pirihihana whakahaere rānei mēnā kei te hiahia koe kia whakaritea:

- he tangata ki te tūtaki i a koe ki te kōti, i waho rānei
- he kaitautoko hei noho i tō taha i a koe ina tuku taunakitanga
- he ārai, he pouaka whakaata ara iahiko kati rānei, kia kore ai koe e titiro atu ki te whakapaenga i a koe e tuku taunakitanga (mō ētahi kēhi anake tēnei).

I te nuinga o ngā kōti, he wāhi tatari motuhake mō te hunga kaiwhakaatu, engari ko te tikanga ka kite tonu pea koe i te whānau me ngā hoa o te tangata whakatuaki i roto o te kōti, i te takiwā rānei o te kōti.

### I TE KŌTI

Hei kaiwhakaatu, ka pātaihia koe ki ētahi pātai mō ngā mea i pā, mō ō mōhio rānei mō te taihara.

Ina tuku taunakitanga koe, i te nuinga o te wā ka kite koe i te whakapaenga.

He mea nui kia whai tautoko koe hei kaiwhakaatu i mua, me taua rā tonu. Me kōrero koe ki tō kaitohutohu pārurenga kōti, kaimahi tautoko rānei mō te tiki tautoko e tika ana mōu.

## Te whakataunga me te whiu

I te mutunga o te kēhi kōti, ka whakatauhia e te rōpū whakawā (mō tētahi whakawātanga rōpū whakawā), e te kaiwhakawā rānei (ki te kore he rōpū whakawā) mēnā kei te hara te whakapaenga, kāore rānei. I ētahi kēhi, pēnei i ērā e kore ai e taea e te rōpū whakawā te whakaae tahi ki tētahi whakatau, ka tū anō tētahi whakawātanga.

Mēnā ka kitea kāore te whakapaenga i te hara, ka wātea ia ki te haere. Ka ohore pea koe ki tēnei me tō hiahia anō ki te kōrero mō tēnei ki tō kaitohutohu kaimahi kōti, kaimahi tautoko rānei.

Mēnā ka kitea i hara te tangata, ka whakawhiua pea ia i taua rā tonu, ka whakatauhia rānei he rā mō tētahi whakawātanga whiu.

### TE TURE WHAKAHŌRITE

Ko te hui ture whakahōrite he hui tēnei ka whakahaere kōkautia i waenga i te pārurenga, te tangata hara, ngā kaitautoko, me ētahi atu tāngata ka whakaaehia, pēnei i ngā māngai hapori, kaiwhakamāori reo rānei.

Mā te hui ture whakahōrite ka āhei ngā pārurenga ki te kōrero atu ki te tangata hara mō te pānga ki a rātau, te whakaputa kōrero me pēhea te whakarite i te kino, me te tīmata ki te whakarite i ētahi o ngā pānga o te taihara.

Mō te whakaaehia kia whakaritea tō kēhi mō te hui ture whakahōrite me whakatau te tangata hara kei te hara, ka whakapuaki rānei ia i hara ia, ka mutu ka whakaae tahi kōrua ki te whakauru atu.

Ki te hiahia whakamārama anō mō te hui ture whakahōrite me pātai atu ki tō kaitohutohu pāpurenga, haere ki [justice.govt.nz/restorative-justice](http://justice.govt.nz/restorative-justice)

## WHAKATAU WHIU

E herea ana te kaiwhakawā i raro i te ture kia whai whakaaro ki ngā āhuatanga maha ina whakatau whakawhiu ia ki te tangata hara, pēnei nā, he aha ngā whakawhiu o mua mō ngā taihara ōrite me ngā pūrongo mō te tangata hara.

Ki te whakaae te kaiwhakawā, ka taea e koe (e tētahi atu rānei i tohua e koe) te pānui tētahi wāhanga, te katoa rānei o tō tauākī pāpurenga i roto i te kōti i te whakawātanga whiu. Tono kia ui tō kaitohutohu pāpurenga o te kōti, te āpiha whakahaere rānei ki te kaiwhakawā mōu. E herea ana te kaiwhakawā ki te whai whakaaro ki tō tauākī pānga pāpurenga ina whakawhiu ia i te tangata hara.

## PAREMATA

I ētahi wā ka whakahauhia te tangata hara e te kaiwhakawā ki te utu i a koe, e kīia ana tēnei he paremata, mēnā i pākia kinohia koe, i riro atu, i tūkinohia rānei ō rawa i tēnei taihara. Ka taea e koe te waea atu ki te kōti i 0800 909 909 ki te whakarite i te tikanga pai e whiwhi ai koe i tō paremata.

## NGĀ PĪRA

He motika ā te kaiwhiu me te tangata hara ki te pīra i te whakataunga me te whakatau whiu. Ko te tikanga o tēnei ka riro mā tētahi kōti teitei ake e tiro-tiro anō te kēhi. Ki te pēnei, ka whakamōhiohia koe e te kaiwhiu mō te hātepe.

---

## I muri i te kōti

Ina whakatauhia i hara te tangata hara, he maha ngā whakawhiu ka taea, pēnei i te mauhere, he whiu hapori, he whaina rānei.

## TUKUTANGA I TE WHARE HEREHERE

Ka tukuna ngā tāngata hara mai i te whare herehere mā te tukuhere, i te mutunga rānei o tā rātau whakawhiu. Ka tukuna pea i mua o te wā e tūmanakohia ana e koe, engari ka uru mai anō te wā i noho i rō whare herehere i mua i te whakataunga me te whakatau whiu.

Ki te mutu te whakawhiu a te tangata hara, me mātua tuku ia mai i te whare herehere. Kāore e āhei ki te pupuri tonu i a ia i rō whare herehere ina mutu tana whakawhiu.

Ka taea te tuku te tangata hara i mua i te mutunga o tana whiu mēnā ka whakaaehia he tukuhere. Ka tirohia e te Poari Tukuhere ngā kēhi o te nuinga o ngā tāngata hara me te whakatau mēnā ka pā he mōreareatanga ki te hapori mēnā ka tukuna tōmuatia te tangata hara.

I te nuinga o te wā me ū ngā tāngata hara ki ngā here whāiti mō te ono marama i te iti rawa mai i te tukunga ki te tukuhere. E whakatauhia ana ngā here e te Poari Tukuhere, e te kaiwhakawā rānei nāna te tangata hara i whakawhiu. Ka kapi pea i ēnei whakaritenga te wāhi me noho ia, ko wai te hunga ka āhei te whakapā atu, mēnā he rāhui haere pō, me ētahi atu āhuatanga tiaki i te hapori.

## KA TAEA E KOE TE KŌRERO ATU KI TE POARI TUKUHERE MŌ Ō WHAKAARO MŌ TE TUKUNGA O TE TANGATA HARA

Hei whakaputa i ō whakaaro mō te tukunga tōmua o te tangata hara mai i te whare herehere, me rēhita koe ki te rēhita whakamōhio pāpurenga kia pai ai te whakapā atu a te Poari Tukuhere ki a koe ina whakawāhia te tangata hara e te Poari Tukuhere.

Hei mātua whakarite kei te hou ō taipitopito whakapā ki te rēhita, me whakapā atu ki ngā pirihimana, Te Ara Poutama o Aotearoa, tō tari tautoko rānei.

Ka taea e koe te tuku atu i ō whakaaro ki te Poari Tukuhere mā te tuhituhi, te hui ataata, ā-tinana rānei:

- **Ā-tuhi, ā-hui ataata rānei.**

Me kōrero atu ki tō Poari Tukuhere.

- **Ā-tinana.**

Ka hui te Poari Tukuhere me koe. Ka kōrero koe ki ērā tāngata anō ka kite i te tangata hara, engari ko te hui e haere ana koe kāore i te whare herehere, ā, kāore hoki te tangata hara i reira. Ka taea e koe te heri kaitautoko atu ki te whakawātanga.

---

## Ngā tangata whakapā matua

He tautoko kei reira mōu ahakoa kei tēhea wāhanga koe o te pūnaha ture taihara, ā, ka taea e ngā kaitautoko whaiaro te āwhina i a koe ki te whakarite i ngā pānga o te taihara.

Anei ngā taipitopito whakapā mō ētahi tino ratonga mā ngā pāpurenga me ngā tāngata e pākia e te taihara. Ka kitea e koe he kōrero atu anō mō ngā ratonga mā te waea atu ki te Victims Information Line i 0800 650 654 (9am ki 6pm mai i te Mane ki te Paraire), haere rānei ki [victimsinfo.govt.nz](http://victimsinfo.govt.nz)

## ACC

acc.co.nz

0800 101 996 Claims Helpline

0800 735 566 Sensitive Claims Helpline

(mō ngā pāpurenga koeretanga)

## Ngā kaitohutohu pāpurenga kōti

0800 650 654 Victims Information Line

## Ara Poutama Aotearoa (Department of Corrections)

04 460 3000

corrections.govt.nz

## Te Poari Tukuhere (New Zealand Parole Board)

0800 PAROLE (727 653)

paroleboard.govt.nz

## Te tautoko whaiaro

Tirohia a [victimsinfo.govt.nz](http://victimsinfo.govt.nz), te wāhanga ratonga āwhina whaiaro rānei i roto i te puka waea.

## Ngā Pirihimana

Ka kitea e koe tō teihana pirihimana tūtata i [police.govt.nz](http://police.govt.nz), i roto rānei i ngā whārangi kikorangi i mua o te puka waea.

## Manaaki Tangata

0800 VICTIM (842 846) 24 haora i te rā

[victimsupport.org.nz](http://victimsupport.org.nz)

## Women's Refuge

0800 REFUGE (733 843) 24 haora i te rā

[womensrefuge.org.nz](http://womensrefuge.org.nz)

## Ngā ratonga whakamāori a Language Line

0800 656 656

9am–6pm Mane-Paraire, 9am–2pm Rāhoroi

## Rārangi kupu

### Utu here

Ina tukuna he tangata kua whakapā hē e ngā pirihimana me te here i runga i a ia me haere ki te kōti.

### Kaitohutohu pāpurenga kōti

He kaimahi nō te Tāhū o te Ture ka whakamārama i te hātepe kōti me te whakamōhio haere i ngā pāpurenga mō te kauneketanga o ā rātau kēhi.

### Whakapaenga

Te tangata ka whakatuakina ki te taihara.

## Te Kōhurutanga

Ina kōhurutia he tangata e tētahi atu tangata.

## Tangata hara

Te tangata ka whakaharaina ki te taihara. (I mua i te whakaharaina ki te hara, e mōhiotia ana te tangata e whakapaehia ana mō te hara ko ia te 'whakapaenga'.)

## Te tukuhere

Ina tukuna tētahi tangata hara i te whare herehere ki te whakamutu i tana whiunga i roto i te hapori. Me mātua whai i ētahi here whāiti.

## Te ture whakahōrite

E taea ana ngā pāpurenga mā te ture whakahōrite te kōrero atu ki tētahi tangata hara mō te pānga o āna mahi, te whakauru whakaaro mō te whakataurite i te hara, me te tīmata ki te whakarite i ētahi o ngā pānga o te taihara. Ka karangahia he hui ture whakahōrite.

## Taihara nui

- He taihara koeretanga, tētahi patunga nui.
- He taihara ko te mutunga he wharanga kino, he mate rānei.
- He taihara e noho mātakutaku tonu ana te pāpurenga mōna anō, mō te ora rānei o tōna whānau.

## Te rēhita whakamōhio pāpurenga

He rārangi matatapu ka whakamahia e ngā tari ture taihara hei whakamōhio haere i ngā pāpurenga mō te tangata hara, pēnei nā, kei hea ake te kēhi i roto i te hātepe kōti, mēnā ka tukuna rangitahitia mai i te whare herehere, ā, āhea ka wātea mō te tukuhere.


Rēhitahia ō taipitopito ki te pirihimana whakahaere i te kēhi.

## Te tauākī pānga pāpurenga

He kōrero mō te pānga o te taihara ki a koe. I te nuinga o te wā ka tuhia te tauākī pānga pāpurenga, engari ka taea te whakauru whakaahua, tātuhinga, whiti rānei. Me mātua whakaaroarohia e te kaiwhakawā ina whakawhiu ia i te tangata hara. Ka taea e te pāpurenga te pānui i te tauākī ki te kōti i mua tonu i te whakawhiu.

## Te rūma kōti

E whakaatu ana tēnei hoahoa i tētahi tauira o te takotoranga o te rūma kōti, me ngā tāngata ka kite pea koe.



1. **Te kaiwhakawā**, ko ia te rangatira o te kōti. Ka whakatau ia mēnā kei te hara te whakapaenga, ā, mēnā kei reira tētahi rōpū whakawā, ka riro mā te rōpū whakawā kē e whakatau.
2. **Te kairēhita o te kōti**, ka āwhina i te kaiwhakawā me te whakarite kei te whāia tikatia ngā hātepe o te kōti.
3. **Te rōpū whakawā**, he mea hanga ki te 12 tāngata māna te whakatau hē ki te whakapaenga.
4. **Te kaiwhiu**, māna e whakahaere te kēhi mō te Karauna, e whakatakoto te kēhi ki te whakapaenga.
5. **Te hunga pāpāho**, he kairipoata e pūrongo ana i te kēhi.
6. **Te kaiwawao**, ka tū hei māngai mō te whakapaenga.
7. **Te whakapaenga**, te tangata ka whakaharaina ki te taihara.
8. **Te hunga tautiaki herehere**, ka tautiaki i te whakapaenga.
9. **Ahurewa mātaki**, te wāhi e noho ai te iwi whānui me te whānau o ngā pāpurenga, te wāhi noho hoki a ngā kaiwhakaatu i muri i tā rātau tuku taunakitanga.
10. **Kaitohutohu pāpurenga kōti**, he āwhina i te kaiwhakaatu kia mārāma ai ki te hātepe o te kōti. Kāore pea e noho i te kōti i ngā wā katoa.
11. **Kaitautoko a te kaiwhakaatu**, te tangata i whakaaehia e te kaiwhakawā hei tautoko i te kaiwhakaatu i roto i te kōti.
12. **Te kaiwhakaatu**, he tuku taunakitanga mō ngā mea i pā, ōna mōhio rānei mō te taihara.